

alma novo crispans pelagus Tithonia Phoebos.  
discurrunt transtris; hi celso cornua malo  
expediunt, alii tonsas in marmore summo  
praetemptant, prora funem legit Argus ab alta.

Increscunt matrum gemitus et fortia languent 315  
corda patrum; longis flentes amplexibus haerent.  
vox tamen Alcimedes planctus supereminet omnes.

femineis tantum illa furens ululatibus obstat  
obruat Idaeam quantum tuba Martia buxum,  
fatur et haec: 'nate indignos aditure labores, 320  
dividimur; nec ad hos animum componere casus  
ante datum, sed bella tibi terrasque timebam.

vota aliis facienda deis. si fata reducunt  
te mihi, si trepidis placabile matribus aequor,  
possum equidem lucemque pati longumque timorem. 325  
sin aliud fortuna parat, miserere parentum,  
Mors bona, dum metus est nec adhuc dolor. ei mihi,  
Colchos

unde ego et avecti timuissem vellera Phrixi?  
quos iam mente dies, quam saeva insomnia curis  
prospicio! quotiens raucos ad litoris ictus 330  
deficiam Scythicum metuens pontumque polumque  
nec de te credam nostris ingrata serenis!

da, precor, amplexus haesuraque verba relinque  
auribus et dulci iam nunc preme lumina dextra.'  
talibus Alcimede maeret; sed fortior Aeson 335  
attollens dictis animos 'o si mihi sanguis  
quantus erat cum signiferum cratera minantem  
non levio Pholum manus haec compescuit auro!  
primus in aeratis posuissem puppibus arma  
concussoque ratem gauderem tollere remo. 340

sed patriae valuere preces auditaque magnis  
vota deis: video nostro tot in aequore reges